



Diario

E MATUTINO DI ARUBA

DIASABRA 26 JANUARI 1991

ABONADO PA LUNA 19,00 FLS**PA EJEMPLAR 0,80 AÑA10/NO.3245

MIGHTY TALENT CALYPSO KING 1991 NEW ROADMARCH KING 1991 TATTOO



ayera nochi den Lago Sport Park a tuma lugar e final di Calypso y Roadmarch unda cu un publico grandi a presencia e spectaculo den e competencia cu tabata tin. Sin cabe duda tabata tin un competencia fuerte pa e titulo maximo tanto den calypso como roadmarch. Como Calypso King 1991 a resulta Mighty Talent, siguie pa Tattoo, na di tercer lugar Mighty Dancer, na di cuatro lugar Challenger y na di cinco lugar Lord Cachete. Como Roadmarch King NOBO a keda den persona di Tattoo, na di dos lugar Mighty Talent, di tercer lugar Mighty Dancer, cuatro lugar Long Roy y di cinco lugar Challenger.

UN CUARTO PARTI DI COSECHA MAISHI RABO PERDI

ORANJESTAD(AAN)--

Mientras cu e forma cu yobida a manifesta su mes te awor a evita daño na plantacionnan, otro factor a hunga un papel pa loke ta trata e cosecha di maishi rabo.

Generalmente ta asina cu ora demasiado awacero presenta su mes, e ta causa desaroyo di diferente tipo di fungus, cu ta afecta e matanan. E aña aki awacero a cay bon y tabata tin dianan seco, mientras cu e yobidanen te awor no a causa ningun tipo di destruccion na e cosechanan.

Loke a sufrí daño ta parti di e produccion di maishi rabo, cu a worde ataca pa moscanan. A worde muestra na DIARIO cu e insectonan ta chupa e pipitanan den desaroyo y esaki a haci cu alrededor di un cuarto parti di e cosecha di maishi rabo a bay perdi.

Pero lo tin suficiente maishi rabo pa Aruba, segun a worde bisa. Ta spera cu cosecha lo ta meymey di otro luna, segun calculacion.

PRISON BIEU NA DAKOTA TA BASHI ATROBE

ORANJESTAD(AAN)--

E prison bieu na Dakota ta bashi atrobe. Agentenan policial actualmente no tin necesidad di hunga pa Guardia di Prison mas.

Informenan ta muestra cu e prison bieu na Dakota, cu na fin di aña pasa a cuminsa worde usa pa warda personanan, cu a viola leynan di Inmigracion na Aruba y tabata spera deportacion, a keda bashi atrobe.

Esaki lo ta debi na e hecho cu ultimo tempo Inmigracion no a tene razzia na gran escala mas. Aunke control na empresanan lo ta continua, razzianan cu a pone autoridad descubri gruponan grandi di trahadoran ilegal, no ta worde teni mas.

Esnan cu keda descubri awor sin papel, ta worde deteni y teni na Warda di Polis te ora nan worde deporta. Esey ta haci cu por lo pronto e prison bieu na Dakota ta bashi atrobe.



ORANJESTAD (AAN)

Ayer tardi a yega Aruba Reverendo Pader Emiliano Tardif riba invitacion di Renobacion Carismático Católico di Aruba. Den oranan di anochi tabatin e prome actividad di di Pader Tardif den Sporthall Santa Cruz. Hopi hende a asisti na e ceremonia di oracion y canticanan di warming up y Santo Sacrificio di Misa di Sanacion di Pader Tardif y Mgr. Willem Ellis. Riba e grafico parti di e presentenan y Pader Emiliano Tardif durante Santo Sacrificio di Misa di Sanacion.

